

四庫全書

集部

欽定四庫全書

椒邱文集卷三十三

明 何喬新 撰

奏議集畧

題為霸占蘆洲等事廣東清吏司案呈奉本部送該南京通政使司連狀送據王智剛周興莫圯趙清等連名告係應天府江浦縣軍民籍成化十七年被豪軍王貴奸民韋圯等將智剛等景泰等年間奏奉戶部勘合委

官勘明撥補坍江田土等項納糧沙洲投獻已故守備
太監黃賜等處占管今又令權豪舍人陳聰違例朦朧
告佃糧累民陪等情又據高英告係應天府六合縣瓜
埠巡檢司砍蘆弓兵本司原額蘆場六處自洪武年間
額徵錢糧運送南京工部交納成化二十一年奸民張
梅鼎糾合鄰場餘丁林埜詭名李鸞強將原額洲場三
處包占蘆柴盡被砍賣肥已該徵柴銀鈔貫負累各兵
棄賣子女房屋償官等情到司行文勘斷徃徃稱係先

年奏對之數不肯退還節該伏覩成化二十三年九月初六日詔書內一款各處地土山塲湖蕩軍民開墾管業已久近年以來多被權豪勢要之家及奸詐無藉之徒侵占投獻雖有禁約事例多不遵守以致小民受害無伸詔書到日限一月以內退還敢有不遵並今後仍前侵占投獻者許被害之人告理照例治以重罪欽此欽遵查得成化二十一年該南京吏部等衙門尚書等官陳俊等為應詔陳言共圖治安等事內一件開稱南

京楊子江一帶蘆洲俱是軍民承佃及巡司弓兵採打輸官納糧近被豪滑之徒妄作新主無主之洲投獻勢要占管稱要賣錢買辦利歸勢要累及貧難合無南京戶工二部委官踏勘除成化十一年以前原管不動外近年以來受人投獻但係有主洲場俱各給還本主管業再不許勢要之人受獻亦不許見在官員之家承佃再有妄行投獻者追問明白發遣充軍等因會奏節該奉憲宗皇帝聖旨是准擬欽此欽遵今王智剛高瑛等

各告前因訪得各項洲場先年多係軍民用力開墾及撥佃起科年久欲照欽奉詔書並陳言事例踏勘明白將有主洲場斷還軍民管業緣中間有係近年勢要之家朦朧奏討之數有碍斷給呈乞定奪等因案呈到部續據山東清吏司呈為投獻湖地事據宋名等告係南京潘陽左等衛餘丁有各祖父先於永樂年間用工開墾營基湖蕩等地成化十八年被軍人靳通等將前項地土投獻屈認租錢今被奸詐之徒張慶等不遵詔書

事理仍前妄報投獻以圖收租等因到司行提張慶等前來不服斷理亦呈到部參照前項蘆洲湖地先年俱係軍兵開墾承佃及弓兵採納輸官利及細民事亦歸一近年豪猾之徒投獻勢要之家就行承佃受獻者懼人告爭輒便朦朧奏討或稱係無主荒地或稱係新生沙洲兼指買辦進貢為詞得請之後無復忌憚或以毗連而混占他洲或名起科而欺隱數倍多者萬餘畝少者數千畝邇年花利奏討者十得二三投獻者十得七

八業主節次告理難會委官踏勘因有奏討明文只得遷
就以致貧難之家業去稅存豪橫之徒地連阡陌幸蒙
陛下洞察下情首頒恩詔不許額外進貢仍將地土山
場湖蕩退還原主軍民懽忭如獲更生臣等尤宜竭心
奉將德音但中間有被勢要之家朦朧奏准管業難擅
斷給欲行南京都察院委有風力御史一員本部及南
京工部各委公正官一員將成化十二年以後一應投
獻洲場地土從公審勘原係軍民用力開墾及先年撥佃

起科者照例給主欺隱畝數撥與無田小民承佃果係
朦朧奏討曾經起科者一體清出給還原主仍將起科
稅糧除豁其侵占投獻及有怙勢不服斷理之人應提
問者許令就便提問應奏請者徑自叅奏照例治以重
罪敢有捏詞妄奏撫拾原委官員者聽該科並法司叅
奏治罪情詞立案不行原委官員亦要秉公循理不許
偏執如此則聖澤流行入免被害緣係委官清理洲場
地土事理未敢擅便具本專差辦事官齎捧謹具奏

聞伏候勅旨

題為修省事該刑部題前事節該太監章闕傳奉聖旨

近日京城雨水為災南又奏大雨雷雨之異朕當檢身飭行祇謹天戒爾文武百官尤當各加修省勉圖報稱母事因循各衙門政事有缺失當舉行改正的斟酌停當來說欽此欽遵臣等備員法司所掌者刑所講者律不敢泛及他事竊惟刑律之制肇自虞之象刑其後夏有政典商有官刑周有三典及漢唐宋而律書日繁我

太祖高皇帝肇造區夏本諸欽恤之心旁採漢唐之制
定大明律以為輔治之具輕重適中度越前代矣列聖
相承因時制宜又有事例以輔律之不及內外法司遵
守惟謹迨今百有二十餘年罔敢違越然律文深奧百
司官吏講解未明或以一字之文而害一條之義及其
引律斷罪往往有乖律意承訛踵謬不知其非此乃有
司因襲之弊非聖祖制律之本意也夫律意不明則刑
罰不當刑罰不當則民有不得其死者矣臣等謹條今

之擬罪有當改正者於後伏乞聖明裁處參酌輕重著
於典章頒行天下永為遵守臣民幸甚等因具本奉聖
旨這本恁還會都察院大理寺詳議停當來說欽此欽
遵會同都察院右都御史屠闕等大理寺卿馮闕等詳
議得凡告子孫及子孫之婦不孝并監臨官因公毆人
至死及因事威逼人致死律例甚明近來有司遇有告
子孫及婦不孝者不問虛實即坐重罪因公毆人至死
者雖不曾用慘酷刑具俱作酷刑官員起送吏部奏請

降調愚民或因忿爭小故致令自盡者俱坐以威逼致死此皆有司因襲之弊殊失律意合依本部所擬改正通行內外法司永為遵守庶幾不失聖祖制律之意其邊遠充軍江南等處發西北衛分江北等處發東南衛分律有坐定地方但近年兵部奏稱內外法司問該充軍人犯俱要就近編發以便勾取合無照依見行事例發遣中間有係苗蠻種類者或發兩廣雲貴衛分充軍以防意外之虞其言國初定律之時鈔重而物輕經今

百有餘年鈔輕而物重要將銀每一兩銅錢每一千文
各估鈔四十貫揆之時估固為有理但銀錢估鈔行之
已久合仍依原估其他一應貨物委有估計失當臣等再
行斟酌估計務在輕重得中另行具奏定奪緣節該奉
欽依還會都察院大理寺詳議停當來說事理未敢擅
便今將會議過緣由開坐謹題請旨

計開

一節該伏覩大明律內一款凡罵祖父母父母及妻

妾罵夫之祖父母父母者並絞註云須親告乃坐
又一款其祖父母父母誣告子孫子孫之婦者各
勿論欽此竊詳律意蓋謂祖父母之於孫父母之
於子天性之至親也子婦悖戾至於毀罵其親故
坐以絞然恐人誣告致罪故云須親告乃坐謂之
親告乃坐者以見他人雖告不坐也近見問刑衙
門遇有祖父母父母告子孫及子孫之婦罵者不
問虛實輒坐以絞是乃親告即坐非親告乃坐矣

使凡親告即坐何以有誣告子孫之律乎凡人之
誣告子孫及子孫之婦者多出於愛憎之偏有因
後妻之譖而憎前妻之子者有溺愛少子而惡其
長子者有欲奪孫之貲產以歸其子者有憎其孫
遂及其婦者使親告即坐則雖恭順如薛包孝友
如王祥者父母一有誣告將不免於死況於其他
乎合無通行內外問刑衙門今後若祖父母父母
告子孫及子孫婦不孝者必須追究得實然後坐

罪如律若祖父母父母偏私誣告仍依誣告子孫律擬斷庶無乖聖朝制律之意而克全天性之恩矣

前件會議得合依所擬

一節該伏覩大明律內一款凡官司決人不如法者笞四十因而致死者杖一百均徵埋葬銀一十兩若監臨官因公事於人虛怯去處非法毆打及自以大杖或金刃手足毆人至折傷以上者減凡鬪

傷罪二等至死者杖一百徒三年追埋葬銀一十兩若於人臀腿受刑去處依法決打邂逅致死及自盡者各勿論欽此查得見行事例各處有司及問刑官有用腦箍夾棍烙鐵關馬棍等項酷刑官員問罪起送吏部奏請定奪或降雜職或革為民蓋所以懲戒殘忍之徒也近見內外官司或因督理公事或因考訊獄囚依法決打致死人命者問刑衙門一槩擬作酷刑黜罷殊與律例不合且鞭

作官刑朴作教刑自古有之但不當肆為殘忍以毒其民耳若因公事決打致死輒出為民非律例之意也合無通行內外問刑衙門今後有犯除用腦箍夾棍烙鐵關馬棍等項慘酷刑具及於虛怯去處毆打致死者照例問罪為民其餘如因公事或笞或杖於臀腿去處決打致死各依本律科斷不在起送降調之例庶於情法得中

前件會議得合依所擬

一節該伏覩大明律內一款凡因事威逼人致死者杖一百追埋葬銀一十兩欽此竊詳律意蓋謂諸色人等或逼取田園或強索財物或見其愚弱而恐之以罪或因其卑賤而脅之以威其人畏威懾勢以至自殺者坐以前罪仍追埋葬之貲給與死者之家近見街市愚夫愚婦或一時語言忿爭或偶因酒醉戲罵本無用勢挾威凌逼情由而愚民輕生輒便自盡者官司徃徃問擬威逼罪名追給

銀兩殊非律意其罪雖止於杖然監追銀兩有力者隨即送官貧窘者淹禁連月甚至於鬻子女典房屋而後完納深為可憫合無通行內外問刑衙門今後遇有此等囚犯研審明白果係因事威逼人致死者依本律科斷若因一時忿爭或因醉戲謔互鬪等項致人輕生自盡別無逼迫之情者止依不應并毆罵人等項律條科斷不必追銀庶幾情法相當而死生無憾

前件會議得合依所擬

一伏覩大明律邊遠充軍條內開江南並浙江江西等布政司府分發定遼山西等都司所轄衛分充軍江北並山西陝西等布政司府分發廣東廣西等都司所轄衛分充軍竊見近來編發充軍囚犯不分南北多發西北邊衛充軍蓋以地方遼廓故欲填實邊衛也然此等四犯多是原問斬絞罪名饒死及一應姦頑梗化輕於犯法之徒徃徃隨到

隨逃仍復為惡雖有仍問死罪處決之例然逃者
接踵終不知警況中間又有原係苗蠻種類諳知
邊情慣習夷語恐其乘隙逃出邊外為之謀主啓
釁擾邊不可不防漢之衛律宋之張元可為永鑑
合無今後編發充軍四徒仍照律內所定地方原
係北人者編發江南衛分原係南人者編發江北
衛分庶可革其屢逃之弊亦可免意外之虞

前件會議得充軍四犯就近編發照兵部見行

事例中間係有北人發兩廣雲貴充軍

一伏覩大明律凡四百六十條其間計贓科罪者居多至於計贓又須估鈔方可定罪然計贓科罪者律也律一定而不可易以贓估鈔者例也例所以輔律可隨時損益之但國初制律之時每銀一兩值鈔一貫今則值鈔八十貫是國初常人盜銀八十兩方得絞罪監守盜銀四十兩方得斬罪今常人盜銀一兩監守盜銀五錢即坐絞斬罪名雖曰

民俗澆漓恐人易犯故重以繩之然非祖宗制律之本意查得正統成化年間都御史陳智監察御史李志剛等各有論奏或欲照依國初估鈔常人盜銀八十兩方坐絞罪或欲照今時估常人盜銀一兩即坐絞罪合而論之賊輕罪重者似過於刻賊重罪輕者似失於縱况陳智等擬奏時估止稱銀兩銅錢而貨物固未之及其後估計貨物雖有定規一向遵行就中輕重失倫者亦多如綿被一

行內外問刑衙門遵依折錢擬罪庶幾得輕重之中而不失制律之意矣

前件會議得銀錢估鈔照舊其餘貨物另行估計

弘治二年九月十八日刑部尚書何關等具題本月二十一日奉聖旨這本內罵祖父母父母一條係干倫理還着吏部會同戶禮兵工四部及通政司六科再將律意講明來說其餘准擬欽此

題為陳言慎刑以弭災變事竊見今年六月以來淫雨連綿潦水泛溢京城內外官員軍民之家牆壁傾頽房屋倒塌通州張家灣河西務等處水勢悍猛臨河居人廬舍漂流人畜溺死者衆糧船客船沉沒損壞者不知其幾父老傳言數十年來水患未有甚於此日者也陛下惻然矜憫即命巡城御史督五城兵馬司查勘京師軍民被災者量加賑卹此實畏天愛民之盛心也臣等仰惟陛下嗣位以來勵精圖治約已裕人召用老成貶

斥邪佞臺諫有言常舍已以從之刑獄有疑每屈法以宥之宜夫和氣召祥雨暘時若星緯順度山川咸寧矣然雨雹風霆天鳴地震迭見於四方之奏報今京師畿甸又有此水災良由臣等任職無狀不能奉宣德意之所致耳俯躬省咎罪不容誅竊伏思之水陰類也以地言之則中國為陽外國為陰以人言之則君子為陽小人為陰以政事言之則德為陽刑為陰洪範庶徵皆由人事所感今雨水為災意者外國之謀侵邊與小人之

或干政與皆非愚臣之所能知臣等亦不敢越職而言
獨以臣職掌言之恐天下刑罰未盡當此亦致災之一
端也夫民情狡詐百端而隱隱未易遽察問四者止據
原詞審錄者多拘成案至於人命強盜情尤難明人命
或因鬪殺誤殺而檢勘者輒以為謀故盜賊或係搶奪
拒捕而巡捕者輒以為強劫苟非的有證佐誰敢輕與
辨明縱欲辯之衆口譁然或以為受屬或以為納賄以
故好名畏謗者寧失入而不敢輕出誠以公道之難明

而謗議之易騰此天下之通患也以在京法司尚且顧忌如此則在外可知矣昔臯陶稱舜曰與其殺不辜寧失不經聖人之仁蓋如此伏望陛下因雨水之災廣好生之德特勅兩京法司將見監重囚再行詳審凡情有可矜法有可疑及人命無屍可檢強盜追無贓仗者備開矜疑緣由具奏取自聖裁在外各布政司及直隸府衛州縣有巡撫者勅巡撫都御史會同巡按並布都按三司官審錄無巡撫者勅巡按御史會同三司並直隸

府衛正官審錄中間有可矜疑者具實以聞仍下法司
參詳取肯定奪其各處該決重囚亦令決囚官員照奉
欽依事理情真罪當者就行處決若有稱冤異詞及情
可矜疑者即與辯理具奏處治庶幾刑獄不冤災變可
弭矣臣等又聞正統四年六月京師大水為災英宗睿
皇帝勅戶部侍郎吳璽順天府尹姜濤存問軍民被水
之家具奏賑卹又條示合行事宜勅五府六部都察院
等衙門各修其職今陛下率由祖宗令典已命巡城御

史查勘京城內外被水軍民給糧賑卹矣其通州一帶水患尤甚乞勅該部委官查勘一體賑卹係官錢糧果被漂流者量為分豁俾聖澤沾被無間遠邇其各衙門合行事宜亦乞遵聖祖勅諭斟酌而行之萬機之暇召問內閣及文武大臣詢訪致災之由同加修省至於修德以凝天命正心以端治原勤聖學以講求治道法祖宗以輯寧邦家此又敬天勤民之大本也尤乞聖心加之意焉臣等昧死陳言不勝戰慄之至弘治二年七月

初五日具題次日奉聖旨兩京及在外刑獄寫勅去審
錄通州抵張家灣一帶並蘆溝橋上下水患戶部便
差官同順天府官查勘被災之家一體賑卹欽此

椒邱文集卷三十三

欽定四庫全書

椒邱文集卷三十四

明 何喬新 撰

奏議集畧

奏為乞恩致仕事臣見年五十九歲江西建昌府廣昌縣人由進士屢更部屬出任藩臬入佐部臺歷官三十餘年叨蒙聖恩累遷顯秩碎首刳心未足報稱顧桑榆之景漸迫蒲柳之姿易衰年踰五十百病交集徃歲在

於山西公幹忽患暗風病證用藥調理暫痊復作每遇
疾作頭目昏眩精神恍惚不能省覽文書今年三月以
來肺經積熱發於四肢眼目昏花艱於僉押兩足酸痛
不任走趨雖欲黽勉從事以効犬馬之報但以筋力難
支每懷竊祿之慚以此疲憊之體寧免曠廢之愆伏望
聖恩憐憫令臣致仕歸田就醫以全殘喘臣不勝懇惻
感恩之至為此具本令義孫何善親齎謹具奏聞伏候
勅旨

奏為陳情乞恩休致事臣見年六十歲江西建昌府廣昌縣人由進士除授南京禮部主客清吏司主事丁憂去職服滿改刑部陝西清吏司主事歷陞本部廣東清吏司員外郎郎中福建按察司副使河南按察司按察使湖廣布政司左布政使都察院右副都御史巡撫山西以殺敗敵寇陞本院左副都御史又為缺官事陞今職歷官三十餘年荐蒙恩寵雖犬馬微忱切於圖報而蒲柳脆質望秋先零臣往在山西因暗風中體兩足麻

痺步履惟艱眼目昏花僉署不便况臣材識迂踈精力
衰憊不堪世用雖知聖恩之未報顧以老病之日侵強
顏班行實切慚覲伏惟皇上哀憐將臣照例致仕歸老田
園以全殘喘臣無任感激之至具本親齎謹具奏聞伏
候勅旨成化二十三年九月某日奉聖旨朕初嗣位正
欲用人分理庶務所辭不允該部知道欽此

奏為辭免陞職事該吏部推選得臣等堪任南京刑部
尚書緣由具題節該奉聖旨何喬新陞南京刑部尚書

欽此欽遵切臣學本迂疎識尤膚淺歷官卽署未著材
猷荐任藩方初無治效出董戎旅無安邊禦狄之績入
佐秋官乏伸冤理枉之能方懷負乘之慚遽沐陞遷之
寵撫躬增懼揣分奚堪况南京實根本之地尚書乃喉
舌之司非臣庸愚可稱委任伏望皇上收還綸命俾臣
仍任舊職以圖補報不勝感戴之至為此具本親齎謹
具奏聞伏候勅旨成化二十三年十月初八日奉聖旨
卿歷官中外鍊達老成特茲陞任所辭不允欽此

奏為乞恩致仕事臣以庸愚遭逢盛世歷任中外三十餘年皇上嗣位之初首陞臣南京刑部尚書曾未數月又蒙欽取來京改任今職近因臣患病欽蒙命醫調治又遣中使下臨賜以酒米等物聖恩深厚碎首剗心未足報稱於萬一臣自少多疾肌體孱弱往歲巡撫山西邠風中體兩股麻痺趨走艱難今犬馬之齒六十有二加以健忘之疾况患病之後邠熱雖除元氣益耗行則膝顫視則眼花臣竊惟刑部尚書以詰奸刑暴為職苟

非資稟剛明曷稱厥任臣以樸櫟之材又迫桑榆之景
精力疲憊則不足於剛神思昏瞶則不足於明以此居
官何以體皇上欽恤之德而察庶獄枉直之情伏望聖
恩憐憫准臣致仕歸老田園以全餘齒則臣雖不能宣
力於生前尤當圖報於冥漠臣不勝懇惻哀祈之至弘
治二年三月十九日具奏本月二十一日奉聖旨卿病
已痊年未衰老不准致仕欽此

奏為乞恩致仕事臣以鄙劣之質生際聖明之時歷任

郎官荐陞藩臬過蒙天寵備員六卿自始仕至今三十有七年而犬馬之齒六十有三矣感恩圖報靡日或忘顧臣自少多疾肌體素羸中年以來暗風襲體每遇疾作心氣怔忡頭目昏暈以致臨政之時處置顛倒不能自知文移糾訛亦不自覺雖聖德寬宏每垂矜宥而臣撫心省咎驚悸實深近又加以頭風痛徹心髓自度百病交攻死亡無日伏蒙聖恩命醫診治又遣中使下臨賜以酒米等物天地大德捐軀未足報稱也切惟一命之

士尚懷報國之心況臣受列聖之恩從六卿之後豈忘竭駑鈍之力以效涓埃之報哉但以老病日侵不堪驅策強顏竊祿實切慙惶伏望聖慈憫臣蒲柳之姿已衰察臣桑榆之景將迫特准致仕歸老田園則自今至死之年皆皇上之賜也臣無任懇惻哀祈之至弘治三年七月初六日具本次日奉聖旨卿年未老宜勉副任用不允致仕欽此

奏為致政以弭災變事邇者乾象示變彗星見於天津

皆由臣等失職所致皇上不忍加罪特賜勅戒諭俾痛
加警省修舉職業聖恩深厚天地莫量臣以菲材叨掌
邦禁明不足以察情偽剛不足以折姦慝刑罰失中上
干天象彗星之變咎實在臣加以年老多病兩目昏眊
僉署惟艱久玷班行實切慙懼伏望聖恩憐憫准臣致
仕歸老田園另選賢能以理刑獄庶幾和氣可致災變
可弭臣不勝恐懼懇祈之至弘治三年十二月十一日
具本十三日奉聖旨卿掌刑獄當勉盡職務以副委任

不允所辭朝廷進退大臣自有公論以後各官不必紛擾自陳吏部知道欽此


奏為乞恩辭免掌印事該本部題為印信事因臣被劾待罪將印咨出在部缺官掌管等因具題奉聖旨印還著何喬新掌欽此伏念臣年老多疾處事乖方已嘗四次上章乞罷聖恩深厚未賜俞允今秋自覺年迫衰暮方欲具本再陳而六科十三道交章劾臣罪戾皇上未即加罪仍待問得明白處治今又命臣還掌印信臣彈

擊之餘百念俱灰正當伏蘖私室以待誅殛何顏復立班行何心掌印泄事況御史鄒魯劾臣貪饕欺罔使臣實有此罪迸諸四夷尚有餘辜堂堂天朝賢材如林豈使貪饕欺罔之人以居大臣之位哉臣俯伏待罪未敢供職伏乞聖明簡命相應官員代臣掌印候饒二漢等問結臣若無干另行具奏致仕若有干礙聽從該衙門提問定奪臣干冒天威無任悚懼戰兢之至為此具本親齋謹具奏聞伏候勅旨

奏為懇乞休致事臣近因暗風舉發不能管事具奏乞
恩致仕欽奉聖旨卿年未老宜勉副任用不允致仕欽
此臣祇奉玉音感激泣下當鞠躬盡瘁死而後已尚未
足以答聖恩之萬一何敢更請但臣力有不能強而情
有不能堪者故敢冒死再瀆聖聰伏乞陛下少垂聽焉
臣自往年巡撫山西暗風中體然或數月一發當時血
氣未衰扶病治事不敢言疾近年以來年齒益老血氣
益衰或一月一發或一月二三發每遇疾作寒熱交攻

頭目昏眩太醫院判任義診脉具知其証非敢妄言自
念死亡無日有孤聖恩此臣之力所不能強者也臣有
三子成化二十二年兩子相繼病故今春長子又亡僅
有一孫年方八歲一門孤寡惻惻無依恃臣為命有可
憫者今臣去家七千餘里一旦溘先朝露非惟孤寡失
所亦且骸骨不能歸葬此臣之情不能堪者也臣聞人
窮則呼天疾痛則呼父母陛下猶天也猶父母也臣危
苦之情如此非訴諸陛下尚誰訴邪伏望聖明曲賜憐

察准臣致仕歸老田園庶幾生則孤寡有託死獲歸骨
首丘則臣志願永畢矣干冒天威罪當萬死臣無任懇
惻戰兢之至為此具本令外孫揭瑀親齎謹具奏聞伏
候勅旨



叔邱文集卷三十四